

President Gion Rest Coray, Ruschein

Autor(en): **Spescha, Albert**

Objekttyp: **Obituary**

Zeitschrift: **Igl Ischi : organ della Romania (Societat de Students Romontschs)**

Band (Jahr): **28 (1941)**

PDF erstellt am: **30.06.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

President Gion Rest Coray Ruschein

da Albert Spescha

Il 9 de december 1940, in grond conduct de bara ha accumpignau nies amitg Gion Rest Coray al davos ruaus. Tgi che ha assistiu a sia sepultura, ha giu l' impressiun, cheu plira buca mo la preziada famiglia per il car bab: in' entira vischnaunca e cun quella l' entira vallada sentan, ch' ei han piars in de lur megliers e zun meriteivels vischins. Quei factum giustifichescha, che nus seregurdein dil car defunct en in cuort artechel egl «Ischi», allegond en special ses merets per la scola, pertgei malgrad siu vast camp de lavur eis el staus en emprema lingia in premurau e versau um de scola.


Signur president Gion Rest Coray p. m. ei naschius ils 11 de november 1881 a Ruschein, nua ch' el ha gudiu ina buna educaziun en famiglia ed en scola. Muort ses buns talents ein ses geniturs se-decidi de tarmetter lur fegl el seminari scolastic a Cuera. Entras sia diligenza e buna conduita acquista el prest la simpatia e la stema de ses conscolars e de ses mussaders. Igl onn 1903 absolve el ses studis cul meglier success e sorprend la scola su-

periura de siu vitg natal. In'entira veta — num-nadamein duront 34 onns — ha el surviu a sia vischnaunca sco scolast della scola superiura. Ei quei buc in clar mussament de sia premura e capacidad sco scolast ed educatur? Cons scolars ein stai confidai ad el en tut quels onns! Els ein stai engrazieivels a lur mussader per tut quei ch'els han retschiert dad el. Perdetga de lur attaschadad ed engrazieivladad ei stada la fiasta giubilara ch'els han preparau a lur scolast igl onn 1928 cun caschun de siu 25avel onn de scola. E pilver el ei staus vengonz d'ina tala manifestaziun. Sia instrucziun era clara ed interessanta e tschaffava il spért ed il cor digl affon. Malgrad ses biars uffecis ch'el haveva d'administrar, vegneva el mai nunpreparaus en scola. Siu conscienzius diari ch'el metteva ad ins sin meisa il di della viseta de scola savess survir per muster a biars de ses collegas. Ei era veramein in deletg d'hospitar ni d'examinar sia scola. El odiava tutta frasa en ed ord scola.

Muort siu character grad e conciliant ha il car defunct prest acquistau gronda stema ed influenza ellas conferenzas scolasticas. La conferenza scolastica della Foppa ha surdau bein prest ad el il presidi. Savens ha ella era confidau ad el il referat, seprofitond de sia rutina enten sclarir e delucidar era las pli grevas damondas. Buca bugen che nies preziau amitg muncavi ad ina conferenza. Siu votum tedlavan ses collegas cun speciala atenziun. El deva per regla alla discussiun temprà e directiva. Era

ordeifer il cumin della Foppa apprezzavan ins gia deditg sia capacidad e sia forza de lavur. Cun acclamaziun eis el vegnius eligius sco president della secziun cantonala dell'Uniun ded umens de scola catolics. En in discuors commuentont declara el ch'el seigi prompts de surprendre quei grev buordi aunc tier sia ulteriura vasta lavur. Cun gronda prudientscha ha el empalau la secziun cantonala era ellas damondas las pli diffucultusas. En qualidad sco president cantonal ha el era fatg part della supra-stonza centrala dell'Uniun ded umens de scola catolics della Svizzeria. Era cheu han ins apprezziau ses votums.

Nus capin per quei fetg bein, sch'era nossas autoritads cantonales de scola ein seprofitadas dellas experiencias ed habilitads dil preziau defunct, surdond ad el en cuminonza cun ulteriurs umens de scola la honorifica incarica de collaborar all'ediziun de novs cudischs de scola per la Surselva. El ei staus meriteivels de quell'attenziun ed ha ademplier sia missiun cun capientscha e premura. Sia lavur cumpeglia en special la part geografica dil cudisch de sisavla classa. Legend questa lavur, havein nus il maletg digl erudit scolast avon nus. Aunc ils davos onns, ch'el haveva gia renunziou a sia piazza de scolast muort raschuns de sanadad, ha il lud. departement d'educaziun incaricau el de translatar ils cudischs de quen de Stöcklin, Basilea, per las classas mesaunas della Surselva. Era quella lavur ha el fatg cun tut quita e grond plascher, essend



President Gion Rest Coray

che quei fuvà puspei novs ligioms ch' unevan el intimamein culla scola.

Cura ch'igl ei setractau d'elaborar in project per la creaziun della scola districtuala a Glion, conform alla donaziun de signur Anton Cadonau, ha il lud. departement d'educaziun era quella gada clamau il versau um de scola ella commissiun predeliberonta. Cura che la scola ei stada creada, ha president Gion Rest Coray fatg part dil cussegl de scola entochen sia prematura mort.

Ch' il car permiert ei restaus attaschus alla scola entochen la fin de sia veta, demuossa era il factum, ch' el ha surpriu sez aunc igl october 1940 de substituir siu feagl ch' era ual en survetsch militar e che dat dapi 1937 la scola de siu bab p. m.

Igl allegau comprova, che signur Gion Rest Goray p. m. ha dedicau sias meglieras forzas alla scola ed all'educaziun della giuventetgna. Denton cuoza la scola tier nus mo sis meins ed ils auters sis meins ha el anflau lavur en abundonza ordeifer la scola. Ils emprems onns ha el fatg la plazza de contabilist de hotel a Lucerna. Era cheu fuss stada aviarta ina splendita carriera ad el. Mo la carezia per la patria q. v. d. per siu vitg natal giavina el a casa, nua ch' el ha fundau igl onn 1911 atgna famiglia. Siu camp de lavur ei carschius onn per onn ed ei cul temps daventaus aschi vasts, ch' ins savess senza grond fastedi scriver in bufatg cudisch leusura. Vischnaunca, cumin, district e cantun ein se-profitai de sias forzas spirtalas per lur agen bein-

star. Circa 30 onns ha el fatg part della suprastonza communal en qualidad sco president ni sco maundretg de quel. Al cumin ha el surviu sco derschader, mistral e deputau. Gronda lavur ha el prestau sco actuar e cassier della dertgira districtuala dil Glogn. Biars onns ha il cumin della Foppa tarmess el sco deputau el Cussegl grond. Era cheu era el fetg respectaus muort siu niebel character e ses votums clars e perschuadents. Il Cussegl grond ha perquei era delegau el el directori della banca cantonala, essend el al current de tuttas damondas che pertuccan l'economia dil general sco era dil singul. Sia carriera politica fuva tenor calculaziun humana aunc ditg buca a fin, mo la Providientscha haveva ordinau autruisa.

La politica che gauda enconuschentamein buc il meglier num ha mai impediù el d'esser fervents el praticar e defender ses principis religius, e tutina respectava el era il proxim che fuva d'ina outra perschuasiun religiosa e politica. Siu character conciliant ed integher e sia supremazia dil spert han per aschidedir predestinau el per la veta publica. Sia veta — siu entir operar sco bab de famiglia, um de scola, ufficial e politicher — duei esser per nus in exempel.

Ed oz gauda il car defunct segir e franc la gronda pagaglia per siu meriteivel operar cheu sin tiara. Quei ei nies meglier giavisch che nus havein per Tei, car amitg!

R. I. P.